

摘藻堂四庫全書薈要

集部

欽定四庫全書薈要卷一萬三千二百五十七

集部

御製文初集卷十八

碑文

實勝寺碑記

去歲夏視師金川者久而弗告其功且苦酋之恃其碣也則創為以碣攻碣之說將築碣焉朕謂攻碣已下策今乃命攻碣者而為之築碣是所謂借寇兵而資盜糧者全無策矣為之憊然因憶敬觀

列朝實錄開國之初我旗人躡雲梯肉薄而登城者不可屈指數以此攻碉何碉弗克今之人猶昔之人也則命於西山之麓設為石碉也者而簡飲飛之士以習之未逾月得精其技者二千人更命大學士忠勇公傅恒為經畧統之以行且厚集諸路之師期必濟厥事賴天之祐大功以成此固經畧智勇克兼用揚我武酋長畏威懷德厥角請命是以敵愾以往者率中道而歸竊恨未施其長技有餘怒焉記不云乎反本脩古不忘其

初雲梯之習猶是志也而即以成功則是地者豈非綏靖之先聲繼武之昭度哉因命於碣傍就舊有寺新之易其名曰實勝夫已習之藝不可廢已奏之績不可忘於是合成功之旅立為健銳雲梯營並於寺之左右建屋居之間亦依山為碣以肖刮耳勒歪之境昔我

太宗皇帝嘗以偏師破明十三萬衆於松山杏山之間歸而建實勝寺於盛京以紀其烈夫金川最爾窮番豈明師比然畧昆明而穿池勝僑如而名子其識弗忘一

也漢書訓碣作雕碣為石室而雕則若雕鶚之棲云者
皆非是蓋西南夷語彼中呼樓居其音為碣云爾

重建

壽皇殿碑記

予小子既敬循

壽皇殿之例建

安佑宮於圓明園以奉

皇祖

皇考神御重垣廣墀戟門九室規模畧備而歲時朔望
來禮壽皇聿瞻殿宇歲久丹雘弗煥且為室僅三較安
佑翻遜巨麗予心歎焉蓋壽皇在景山東北本明季遊
幸之地

皇祖常視射較士於此我

皇考因以奉

神御初未擇山向之正偏合闕宮之法度也乃命奉宸
發內帑鳩工庀材中峯正午磚城戟門明堂九室一仿

太廟而約之蓋安佑視壽皇之義壽皇視安佑之制於
是宮中苑中皆有獻新追永之地可以抒忱可以觀德
傳不云乎歌於斯哭於斯則壽皇實近法宮律安佑為
尤重若夫敬奉

神御之義則見於安佑宮碑記茲不複述惟述重建本
意及興工始末歲月蓋經營於己巳孟春而落成於季
冬上澣之吉日云敬作頌曰

惟堯巍巍惟舜重華

祖

考則之不競不綌叶仁漸義摩

祖

考式之宏

仁皇仁明

憲帝憲小子職之是繼是繩叶曰明曰旦小子慝之天

遊雲殂春露秋霜予心惻之

考奉

祖御於是壽皇予仍即之製廣向正叶爰經爰營工勿
亟之陟降依憑居歆攸寧美牆得之佑我後嗣縣禋於
萬匪萬億之觀德於茲無然畔援永欽識之

碧雲寺碑文

西山佛寺累百惟碧雲以閎麗著稱而境亦殊勝岩壑
高下臺殿因依竹樹參差泉流經絡學人瀟灑安禪殆
無有踰於此也自元耶律楚材之裔名阿利吉者捨宅
開山淨業始構明正德中稅監于經為宅窳計將以大

作功德而寺遂廓然煥然至魏忠賢踵而行之奢僭轉甚夫奉佛者不廢莊嚴要以清淨為本如梵夾所載人天供養窮極珍異皆本清淨為莊嚴也否則汙法席而玷山靈何福田利益之有雖山體常新如如不動初無纖毫增損而自人事觀之有足慨者當明政不網祿人專恣鬼神為之怨痛猶欲佞佛以求庇於地下而為其上者方且假以寵靈錫之題額若惟恐其香火之不延宅兆之不固殿後罪惡貫盈刑誅踵接而穢跡之標揭

於林莽間者迨易世廼克剷除追惟末造誰實尸之斯足為車鑒也已朕駐蹕靜宜園時過此寺樂觀林壑之美而念古刹之有待於護持也爰命重加整葺喜其滌瑕盪穢而復為淨域因筆之於石用垂戒焉

金剛寶座塔碑文

昔如來成等正覺必坐菩提道場蓋法王人王有世出世間之異而居尊御極其理則同故寶座莊嚴所以正天人師之位也佛威神力能使六種震動而當其初轉

無上法輪轉一切天人所不能轉則地為普動以應之
惟道場安立之區常住不動其地乃三千大千世界之
中上極金輪下侵地際金剛所成周百餘步如須彌之
隱於沙界而露其巔去來諸佛並於此坐而入金剛定
以是名金剛座焉摩揭陀國鉢羅笈山聖蹟彰明諸方
信嚮佛滅度後座隱不見諸國王乃以銅觀自在像南
北標識其處殿後又仿浮屠之制範金為座以便供養
平臺特起周匝嚴淨象道場廣輪之所極也五塔岳峙

各具寶相象物之徧歷四隅而常依止中座也西域流傳中土希有乾隆十有三年西僧奉以入貢爰命所司就碧雲寺如式建造尺寸引伸高廣具足勢同地涌望擬天游賢劫祖庭實在於是夫塔廟之設類以藏舍利齒髮為過去崇奉地耳此座獨表法王御世之初威德尊勝若是其靈異顯著將人天瞻仰恍如佛日之方中而神力之所加持固有歷劫不傾者成此善果因備述其緣起云

香界寺碑文

香界寺在香山迤南故為平坡寺不知其所由始蓋古刹也其後名聖感寺康熙中僧海岫薰脩於此經營十載重事鼎建

皇祖聖祖仁皇帝嘗再幸其地賜

御書榜額且

製碑文勒石紀焉閱今數十年丹青剝落庭宇且就荒寂朕駐蹕靜宜園間於幾暇游覽近地偶叩禪扃瞻仰

宸翰雲霞暉麗照灼猶新剔蘚捫碑具悉始末因出內
帑命將作撤而新之易其名曰香界夫西山巖壑幽邃
峯岫環映林泉烟靄隨處具有佳致精藍梵宇遠近相
望皆足為名山增勝槩而朕意所存自以

皇祖經臨永昭

神蹟香林法界允宜敬謹護持又不獨智仁山水之樂
云爾爰刻文碑陰以誌歲月

梵香寺碑文

朕既於勇健營旁近建實勝寺其南有梵香寺者亦古
招提在西山諸刹中未為宏麗而爽塏不下實勝爰命
所司以餘材飭而新之為衆生利益在昔佛告精進菩
薩摩訶薩受持法華成就八百四千萬功德以是清淨
鼻根聞於三千大千世界上下內外種種諸香皆能分別又
香積如來以衆香鉢盛滿香飯與化菩薩悉飽衆會夫
禪那脫離塵垢腥濁眼耳鼻舌身意常滿清淨妙香所
住世界安隱快樂舉成華歲世界海中妙華光香水海

隨身衣食無非清淨是為梵香法界以是因緣發大慈
悲願以清淨妙香普度恒河沙數衆生舉登安樂壽命
世界永離刀兵腥穢一切苦惱以所被香祴為衆生本
分衣舉得溫適所飽香積為衆生本分食舉得饜飫從
上諸佛普證是言散梅檀沈水及千萬種華香於三千
大千世界齊湏彌山為佛供養與此功德初無有二用
刻堅石傳示未來厯無盡際

重修惠濟祠碑

經國之務莫重於河與漕而兩者必相資而成曩者東南之民數厯河患矣我

皇祖聖祖仁皇帝亶天縱之神明乾苞坤絡瞭列指掌清蹕屢勤比隆神禹開示方畧神契龜從用詒萬世無疆之休河臣稟受

聖謨罔失尺寸若隄若遙隄若縷隄若月河若引河若壩若堰若牐措必其要用必其時河奏安瀾民無昏墊成績彰灼五紀於茲天庾陳紅雲帆直達厥包織篚琛

賁南金公私百貨之需船輸艦載楫交津渠溯前代南
北運道逆河而上者五百餘里明季開泇河避黃河之
險者三百里越我朝康熙年間開皂河以通泇復開中
河以通阜漕艘出清口絕流北入中河浮于黃者僅七
里遂盡避黃河五百里之險漕之利無過此時者黃河
自積石龍門徑豫徐東下挾淮泗交流入海勢湍悍不
可禦泥濁易閼漕艘渡江達淮黃河亘其衝其入中河
也必資於黃治之之道以清淮迅激蕩滌之俾無壅沙

河恒強淮恒弱則瀦洪澤之巨浸以助之交會於清口
是為運道之樞紐河防之關鍵導河入淮利漕舉繫於
此瀕河迄下游郡縣數十城郭田廬皆恃以為命司水
土者恒惴惴焉清口治而河與漕胥得其理矣清江浦
之疾神祠曰惠濟鼎新於雍正二年靈貺孔時孚應若
響過祠下者莫醴薦牢靡敢弗肅乾隆十有六年朕巡
省南服瞻謁庭宇敬惟神功庥佑宜崇報享命有司鳩
工加煥飾焉夫名山大川精氣磅礴必有神焉主之經

國大政比賴生靈必有神焉相之其顧享者必其有勤
民敬事之忱者也苟隳庶事而瘵厥官或穿鑿自用而
失其故有弗干譴怒而懼其罰者乎政罔弗脩無貽神
羞敬舉乃職神錫爾極惟神式憑庶永底寧勒文貞珉
用諗河臣遂為迎神送神之歌辭曰

河之來兮天上皓皓盱盱兮無與抗瀾瀾兮清淮滙淪
漣兮河流潛潛戕巨觴兮橫中流望靈旗兮澹淡游桂
檝兮荃橈紛弭節兮蘅皋絙絃兮考鼓俎肥牲兮式歌

且舞神格歆兮福女 千夫邪許兮寡長
茭鞶金隄兮障彼樂郊鄂舟容與兮
吳榜交溯長川兮利濟轉玉粒
兮時攸賴洪濤伏兮神哉沛簫管競兮
應櫂歌神之留兮祥飈和紹平成兮
恪歲事飫苾芬兮虔報祀靈河翁
兮福萬世

萬壽山大報恩延壽寺碑記

欽惟我

聖母崇慶慈宣康惠敦和裕壽皇太后
仁善性生惟慈

惟懿母儀天下尊極域中粵乾隆辛未之歲恭遇

聖壽六袞誕辰朕躬率天下臣民舉行大慶禮奉萬年
觴敬效天保南山之義以甕山居昆明湖之陽加號曰
萬壽勅建梵宮命之曰大報恩延壽寺殿宇千楹浮圖
九級堂廡翼如金碧輝映黹香燈函貝葉以為禮懺祝
嘏地朕惟人子之於親恩罔極則思報之心與為罔極
而報恩之分恒不能稱其思報之願凡所為祝釐頌嘏
脩香光之業開法喜之筵於申報曷能以毫髮數亦隨

時隨地致其愛慕誠惻云爾我

聖母至仁廣被如大雲起雨一切卉木藥草隨分受潤
慈心善質自足以緝純嘏集遐福盛德之致福永年固
有不求而至焉而茲復以祇陀布金之園為灌佛報恩
之舉金盤炫日則光照雲表寶鐸含風則音出天外法
鼓洪響偈頌清發於以歡喜讚誦不更有以廣益福利
縣遂增高為

聖母上無量之壽哉自今伊始其以茲寺為樂林為香

國萬幾之暇親奉

大安輦隨喜於此前臨平湖則醍醐之海也後倚翠屏
則阿耨之山也招提廣開舍利高矗則琉璃土而玉甕
臺也散華歲蕤流芬飛樾梅檀之香遡風而聞迦陵之
鳥送音而至我

聖母仁心為質崇信淨業登斯寺也必有欣然合掌喜
溢

慈顏者亦足為承懽養志之一助且山容清淨貞固恒

久寶幢金刹日月常新藉茲山之命名申建寺之宏願
春暉寸草之心與俱永焉爰為之記并依般若四聲作
祝頌曰

佛言慈善根廣受諸利益如縑能藉玉如磁解吸鐵又
言布施力指期得果報如尼拘類樹歲收實數萬洪惟
我

聖母聖善實性生至仁蔭世界慈氏再出世譬猶乘谷
吹葭管纔一動萬物盡和煦藹然遊春溫以此無量德

致彼無量福五福壽最先壽量不可說我欲報罔極亦
復何以加寶篆鏤精璆瓊冊鐫華玉繫聞香光業供養
利人天堪以無礙施廣益無量壽遂効呼嵩祝耆闍崛
移來更闢甘露場祇樹園布就青鴛大蘭若堂殿八九
重鐵鎖界百道鈴鐸半空響後有舍利塔直上凌虛空
高懸金露盤去地百餘丈中為無垢地處處白銀塔塗
壁百品香窰地七寶飭堂堂蓮華座寶相何莊嚴湧現
白毫光圓容規滿月其餘大菩薩羅漢及金剛金縷伽

梨衣各各端正寶刹初告成

聖壽聿屆臨綵幢華蓋中虔脩佛頂會以何備供養新
鮮五莖花摩勒果萬枚伊蒲饌千斛又何備供養五綵
毼毼新羅紫金鐘祇洹青玉鉢環繞禮法懺膜拜復
唄誦牟尼一串珠徧繡榆欂函轟轟法鼓震琅琅銅鈸
響簷蔔散馥郁慧燈發光明維時十方界無不生歡喜
龍天八部中一聲齊讚歎天女散香花衆花紛紛下拈
花虔頂禮敬上無量壽亦有大迦葉如聞緊那弦起作

小兒舞敬上無量壽最後如來佛降自忉利天手持千葉蓮敬上無量壽

聖壽本無量更有無量加無量復無邊萬萬千千歲以茲福德地常作快樂園時駕紫闥車來此一隨喜喜林大慈鬱樂樹高婆娑四望種福田三界選佛地朝朝承聖歡歲歲奉

慈輦延此無量壽敬報罔極恩

御製文初集卷十八

欽定四庫全書薈要卷一萬三千二百五十九

集部

御製文初集卷十九

碑文

平定準噶爾告成太學碑文

遼矣山戎薰粥旃裘毳幕之人界以龍沙畜其驂奚雖
無恒業厥有分部蓋自玄黃剖判萬物芸生東夷西夷
各依其地謬舉淳維未為理據皇古莫紀其見之書史
者自周宣太原之伐秦政亘海之築莫不畏其侵軼猶

夏是虞自時厥後一二奮發之君慨然思挫其鋒而納之宥然事不中機材不副用加以地遠無定處故嘗勞衆費材十損一得搢紳之儒守和親介胄之士言征伐征伐則民力竭和親則國威喪於是守有四夷羈縻不絕地不可耕民不可臣之言興矣然此以論漢唐宋明之中夏而非謂我皇清之中夏也皇清荷

天之龍興東海撫華區有元之裔久屬版章歲朝貢從征狩執役惟謹噶爾厄魯特者本有元之臣僕叛出

據西海終明世為邊患至噶爾丹而稍強吞噬鄰蕃
闌入北塞我

皇祖三臨朔漠用大破其師元惡伏冥誅脅從遠遯跡
毋俾遺種於我喀爾喀厥姪策妄阿拉布坦收其遺孽
僅保伊犁故嘗索俘取地無敢不共逮夫部落滋聚乃
以計襲哈密入西藏準夷之勢於是而復張

兩朝命將問罪雖屢獲捷而庚戌之役逆子噶爾丹策
凌能用其父舊人乘我師怠掠畜於巴里坤擣營於和

卜多於是而準夷之勢大張然地既險遠主客異焉此
勞往而無利彼亦如之故額爾德尼招之敗彼亦以彼
貪利而深入也

皇考謂我武既揚不可以既允其請和以息我衆予小
子敬奉

先志無越思焉既而噶爾丹策凌死子策妄多爾濟那
木扎爾暴殘喇嘛達爾扎篡奪之達瓦齊又篡奪喇嘛
達爾扎而酗酒虐下尤甚焉癸酉冬都爾伯特台吉策

凌等率數萬人來歸越明年秋輝特台吉阿睦爾撒納
和碩特台吉班珠爾又率數萬人來歸朕謂來者不可
以不撫而撫之莫若因其地其俗而善循之且毋令滋
方來之患於我喀爾喀也於是議進兩路之師問彼罪
魁安我新附凡運餉籌馱長行利戰之事悉備議之始
熟經於庚戌之艱者咸懼蹈轍惟大學士忠勇公傅恒
見與朕同而新附諸台吉則求之甚力朕謂犁庭掃穴
即不敢必然喀爾喀之地必不可以久居若而人毋寧

用其鋒而觀厥成即不如志亦非所悔也故凡

禡旗命將之典槩未舉行亦云偏師嘗試為之耳塞上用兵必以秋而阿睦爾撒納禡木特請以春月欲乘彼馬未肥則不能遜朕謂其言良當遂從之北路以二月丙辰西路以二月己巳各起行哈密瀚海向無雨今春乃大雨咸以為時雨之師入賊境凡所過之鄂拓克攜羊酒糗糒迎恐後五月乙亥至伊犁亦如之達瓦齊於格登山麓結營以待兵近萬我兩將軍議以兵取則傷

彼必衆彼衆皆我衆多傷非所以體上慈也丁亥遣阿
玉錫等二十五人夜斫營覘賊向賊兵大潰相蹂躪死
者不可勝數來降者七千餘我二十五人無一人受傷
者達瓦齊以百餘騎竄六月庚戌回人阿奇木霍集斯
伯克執達瓦齊來獻軍門準噶爾平是役也定議不過
二人籌事不過一年兵行不過五月無亡矢遺鏃之費
大勲以集遐壤以定豈人力哉
天也然

天垂佑而授之事機設不奉行之以致坐失者多矣可
與樂成不可與謀始亦謂蚩蚩之衆云爾豈其卿大夫
之謂既克集事則又曰苟知其易將勸為之夫明於事
後者必將昧於幾先朕用是寒心且準噶爾一小部落
耳一二有能為之長而其樹也固焉一二暴失德之長
而其亡也忽焉朕用是知懼武成而勒碑文廟例也禮
臣以為請故據實事書之其辭曰

茫茫伊犁大幹之西匪今伊昔化外羈縻條支之東大

宛以南隨畜獵獸蟻聚狼貪乃世其惡乃恃其遠或激
我攻而乘我緩其計在斯其長可窮止戈靖邊化日薰
風不侵不距不來其那款關求市亦不禁訶始慕希珍
終居竒貨吏喜無事遷就斯悞漸不可長我豈懼其豈
如宋明和市之為既知其然飭我邊吏弗縱弗嚴示之
節制不仁之守再世斯斬篡奪相仍飄忽荏苒夙沙革
面煎鞏披忱集泮飛鶚食黠懷音錫之爵位榮以華裾
膝前面請願効前驅兵分兩路雪甲霜鋒先導中堅如

鼂錯攻益以後勁蒙古舊屬八旗子弟其心允篤二月
卜吉牙旗飄颻我騎斯騰無待折膠泉涌於磧蕪茁於
路我衆歡躍謂有

天助匪啻我衆新附亦云黃髮未覩水草富春烏魯木
齊波羅塔拉台吉宰桑紛紛款納牽其肥羊及馬潼酒
獻其屠耆合掌雙手予有前諭所禁侵陵以茶交易大
愉衆情衆情既愉來者日繼蠢達瓦齊擁兵自衛依山
據淖惟旦夕延有近萬人其心十千勇不目逃掄二十

五曰阿玉錫率往賊所銜枚夜襲直入其郭揮矛拍馬
大聲疾呼彼人既離我志斯合突將無前縱橫鞚鞞案
角鹿埵隴種東籠自相狼藉孰敢櫻鋒狐竄鼠逃將往
異域回部遮之兇渠斯得露布既至告

廟受俘凡此歲功荷

天之衢在古周宣二年乙亥淮夷是平常武詩載越我
皇祖征噶爾丹命將

禡旗亦乙亥年既符歲德允協師貞兵不血刃漠無王

庭昔時準夷弗恭弗諛今隨師行為師候尉昔時準夷
日戰夜征今也偃卧知樂人生曰匪準夷曰我臣僕自
今伊始安爾遊牧爾牧爾耕爾長孫子曰無向非豈有
今是

兩朝志竟億載基成側席不遑保泰持盈

平定準噶爾勒銘伊犁之碑

惟

天盡所覆俾我皇清罔不在宥惟清奉

昊天撫薄海兆庶悉主悉臣

叶

太祖

太宗

世祖肇基宅中皇耆其武

聖祖

世宗覲光揚烈克臻邳隆逮予藐躬思日孜孜期四海
同風咨汝準噶爾叶亦蒙古同類何自外携數世梗化
篡奪相仍碩仇其下厥達瓦齊甚毒於醒衆心底底如

苗斯蠹如虺斯螫衆口嗷嗷視爾嗷止予焦勞止期救
不崇朝止視爾底止予噫嘻止亟出汝塗泥止迺命新
附爾為先鋒熟悉其路迺命勁旅攜數月糧毋或掠擄
師行時雨王旅嘽嘽亦無滌阻左旋右抽王旅渾渾既
暇以休烏魯木齊及五集賽度之折折台吉宰桑迎降
恐後奚事斧吭波羅塔拉闔爾奇嶺險如關闔倒戈反
攻達瓦齊走旦夕塗窮回部遮獲彼鼠斯喙地入無隙
露布飛至受俘午門爰貸其罪自今伊始四部我臣伊

犁我宇叶曰綽羅斯及都爾伯特和碩特輝特封四可
汗衆建王公遊牧各安宰桑公臣屬我旗籍誰汝苦辛
爾恭爾長爾孳爾幼徐以教養爾駝爾牛爾羊爾馬畜
牧優游分疆各守毋相侵陵以干大咎齊禦外域曰布
魯特越哈薩克醉飲飽食敬興黃教福自天錫伊犁平
叶矣勒貞珉矣於萬斯年矣

平定準噶爾勒銘格登山之碑

格登之崔嵬賊固其壘叶我師堂堂其固自摧格登之

截薛賊營其穴我師洸洸其營若綴師行如流度伊犁
川粵有前導為我具船渡河八日遂抵格登面淖背巖
藉一昏冥曰擣厥虛曰殲厥旅豈不易易將韜我武將
韜我武詎曰養寇曰有後謀大功近就彼衆我臣已有
成辭火炎崑岡懼乖皇慈三巴圖魯二十二卒夜斫賊
營萬衆股栗人各一心孰為汝守汝頑不靈尚竄以走
汝竄以走誰其納之縛獻軍門追悔其遲於恒有言曰
殺寧育叶受俘赦之光我擴度漢置都護唐拜將軍費

賂勞衆弗服弗臣既臣斯恩既服斯義勒銘格登永詔
億世

普寧寺碑文

乾隆二十年夏五月平定準噶爾冬十月大宴賚四衛
拉特部落舊附新歸之衆於避暑山莊曰綽羅斯曰都
爾伯特曰輝特曰和碩特四族台吉各封以汗王貝勒
貝子公若而人其無隸屬之宰桑則歸之公如內八旗
外四十九旗喀爾喀四部之例至是而內外一家遐邇

同風之言允符昔我

皇祖之定喀爾喀也建彙宗寺於多倫諾爾以一衆志
式循

舊章建普寧寺於山莊之北麓而為之記曰

皇天有輔德之私

至聖有越世之度君子有見幾之作非人有可格之誠
我國家撫有衆蒙古詎準噶爾一部終外王化雖庸衆
有威之不知畏惠之不知懷地不可耕民不可臣之言

其然豈其然哉以我

皇祖

皇考聖德神功經文緯武其於奠伊犁勒銘格登山朝
四部落之衆而錫之爵賜之幣式宴陳舞可汗起奉酒
稱萬壽如今日者何難默契

大造意若有待是以遵養時晦垂成弗為予小子敬承
乾佑以為不可失者時遲徊觀望寧

二聖付託藐躬之意且此山莊即

皇祖歲時巡覲諸蒙古賓客之所也越三十年而克見
準噶爾之衆咸覲於此豈非

皇天無私惟德之輔

至聖之度越世先知而見幾君子之作予亦不敢不勉
衛拉特之衆豈終不可格以誠哉蒙古向敬佛興黃教
故寺之式即依西藏三摩耶廟之式為之名之曰普寧
者蓋自是而雪山蔥嶺以逮西海恒河沙數臣庶咸願
安其居樂其業永永普寧云爾復依普賢世界品而述

偈言

抖贊轉輪王

功德甚深大

造寺於西域

其名三摩耶

逮今千歲餘

願海裝嚴就

肖彼須彌山

巍閣凡三層

日月在兩肩

地金水風輪

其內小鐵圍

大鹹海水滿

持地障礙山

馬耳及善見

擔木並持軸

持雙凡七山

其中乃香水

其上堅手天

持鬘及恒憍

四天王所住

復有四方天

其數各以八

中乃忉利天

善見帝釋宮

欲界四天子

色界無色界

次第居其上

東曰勝神洲

小勝及勝勝

左右以次住

南曰瞻部洲

妙拂並小拂

左右以次住

西曰牛賀洲

行道將小行

左右以次住

北曰俱盧洲

寔勝復謠勝

左右以次住

供養佛無數

如普賢願海

復為四色塔

義出院羅尼

四智標功用

懿此避暑莊

古佛所游歷

較彼衛藏地

佛土無差別

有來衆蒙古

及新衛拉特

咸敬黃教人

爰作大利益

肖彼三摩耶

為奉天人師

作此曼拏羅

嚴潔身口意

依法香泥塗

一切皆清淨

香花供養具

法螺法音聲

轉無量法輪

聚無量法衆

誦無量法寶

作無量法事

我聞普賢言

華藏莊嚴海

是毘盧遮那

往劫修行處

種種寶光明

大雲徧一切

捨身等塵刹

以昔願力住

徧十方國土

出苦向菩提

方便示調伏

世界所有塵

一一見法界

現佛如雲集

此是如來刹

大願周法界

一切化羣生

莊嚴從此出

西土及震旦

究竟無同異

衆生皆安隱

暨蠕動肖翹

遂生明佛性

稽首天人師

普賢行如是

玉泉山東嶽廟碑文

東嶽為五嶽宗德發揚誦萬物出雲雨以蕃殖嘉穀阜
成兆民伊古以來秩視三公載在祀典尚已顧天門日
觀去京師千里而遠歲時泣事職在有司方望之祀非
遇國家大慶及巡狩所至未嘗輒舉是以郡邑都會往
往崇廟貌以奉必馨夫亦以東方春生之氣貫於四時
明靈盼蠭無往弗格祝釐祈禱誠應響捷如生氣之於
物肖翹跂喙洪纖媿惡無不畢達固非特巖巖具瞻表
望齊魯而已京師之西玉泉山峯巒竊深林木清瑟為

玉泉所自出滋液滲漉澤潤神臯與泰山之出雲雨功用廣大正同爰即其地建東嶽廟凡殿宇若干楹規制崇麗以乾隆二十有一年工竣有司以立碑請稽古制四望無廟祀然周官小宗伯所職四望有兆典祀掌外祀之兆皆有域又山虞祭山林則為主曰兆曰域曰主皆欲神有所憑依而致其昭格也近代既有象設則立廟以祀尤洋洋顯赫其致精誠以交於神明不益著歟夫七十二君封禪之說荒邈無稽而金泥玉檢登封岱

宗漢唐令辟尚不免侈為盛儀動色矜耀謂合於經所
云因名山以升中於天夫名山所在多有均為造化靈
粹所鍾英爽若接東嶽之為泰岱人皆知之而不知山
嶽之靈不宗朝而雨天下其精神布濩固無不之譬夫
山下出泉隨地歆湧導之即達固不可謂水專在是則
東嶽之祀於茲山也固宜是為記

浙海神廟碑文

浙西地瀕海扼其衝者先海寧次錢塘錢塘距海門尚

一舍而遠然天下言觀潮之奇者獨推廣陵之胥母蓋
徽歙衆山水自新安江下至富陽而金衢嚴處數郡千
巖萬壑復匯入錢塘出海必得海潮逆之全涌拗怒軋
盤盪裔然後流益急而軌益順故江之歸壑非濤不為
功然其北擊南蕩生民農桑之命繫焉斯恃塘堰為保
障漢書注始紀郡議曹華信作塘捍潮唐書捍海隄凡
二百二十四里宋元二史並誌袁花諸塘之修築及石
困木櫃之坊禦如世所傳斛土千錢之諺其勤且難如

此雍正八年我

皇考世宗憲皇帝以海塘告成維

神効靈助順

特勅建廟海寧褒封秩祀用申昭報近海州縣不知有
水患者二十餘年於茲然其時潮尚循北疊也乾隆辛
未丁丑朕兩巡浙水登觀潮樓乃悉所為趨北疊而有
軼則仁錢逸西害不可言趨南疊則蕭會諸邑之戴山
者藩攤畧具猶間有陟齧之虞比年來大溜直趨中疊

兩岸沙渾鱗起如左右引從民居其間川原膏沃可耕
可桑曾不知白馬骨濤足以動心而駭目夫人之情久
則忘而逸則淫今之居樂土安作息者非昔之日夜怵
惕懼為魚之民也耶則我

皇考之深宮宵旰謀建塘以衛生靈與

明神之朐蠃垂簾嘉佑是邦其何可以弗紀觀潮樓當
錢塘都會之地東瞻中壘為尤悉爰視海寧

祠宇之例命守臣鳩工庀材崇象設而展時事夫元氣

灌輸端委相成無感弗假又何一二之可區分我因為
迎神送神歌俾肆之工祝以揭虔妥靈其辭曰

赭龕閑兮翼戶
毗紫瀾兮滄嶼
冰夷導兮江婁
扈兩旂
穆毫兮金支中樹

神之來兮按部迴水犀兮萬弩虹隄一綫兮安堵福我
民兮於昭揚誦傳芭兮鼙鼓紛配藜兮神靈雨

右迎神


擘若木兮留暉
欄雲解駭兮蘋
霞罨幃罇蠲滌兮俎膾

肥聆繁會兮叶呼豨

神之去兮載祈波恬羅刹兮石平磯潤千里兮涵郊圻
引晦濁兮歸墟是歸式歆饗兮庶幾朝朝夕汐兮長無

送神

御製文初集卷十九



總校官庶吉士 臣 張能照

校對官庶吉士 臣 翟槐

謄錄監生 臣 溫之誠

欽定四庫全書薈要

集部

御製文初集卷

二十至
二十二

詳校官原任編修臣徐立綱



欽定四庫全書薈要卷一萬三千二百五十九

集部

御製文初集卷二十

碑文

中州治河碑



民為本在知民莫達之隱民以食為天在防食致
害之源害源不求食則無秋達隱莫知民則何依豫民
之向隅也切體恤之悉為灾之因療也為驟剔之時則
守土之臣曰胡寶琮襄事之臣曰裘曰修二臣奉朕旨

不惜工不愛帑不勞民水用洩土計方上源下游以次就治撫臣胡寶琮因民之請欲泐石紀恩而建亭以覆之朕維此繁文可勿事惟是斯民之利賴有宜垂示久遠者虞書言養民之政舉水火金木土穀為六府禹之明德遠矣究其所設施則決川距海即系之以濬畝澮距川周禮遂人掌邦之野有遂有徑有溝有畛有洫有涂有澮有道有川有路而稻人掌稼下地蓄水止水蕩水均水舍水寫水而後作田古先哲王其納天下於在

宥兵農禮樂至一名一器之微皆纖悉為之制而必先之以水土之政此地平天成之所由基也水土之政不修食曷由出朕於四方水旱之告蠲振動以千萬計顧圖之於既災之後不如籌之於未災之前仰體

上天覆育元元之心罔敢暇逸以無負所付用康乂我億兆人良有司為朕分牧民之任者其亦體朕心以期於永永弗隳則朕之至願也至於齊徐淮海莫不分命臣工董司其事以䟽以淪尋源注委而豫居天下之中

黃河界其北淮瀆經其南平原高壤無大陸廣川為之
瀉故尤為難治今自滎澤以下導汴渦沙汝諸水以流
其惡其支分派別或隄以束之或濶以瀦之或引之使
分或匯之使合曲之使有容直之使徑達為水門以蓄
洩之為涵洞以吐納之朕後先宣示之旨及諸臣之疏
具在茲不複叙為叙其大指若是嗟乎豫之民其受困
亦亟矣及朕知之始為之易撫臣發帑粟興水利然救
什一於千百其亦遲矣朕方抱愧之不暇而曰民感恩

乎其益增吾愧而已矣

平定準噶爾後勒銘伊犁之碑

天之所培者人雖傾之不可殛也

天之所覆者人雖裁之不可殖也嗟汝準噶爾何狙詐
相延以世而為賊也彊食弱衆凌寡血人於牙而蔑知
後易也云興黃教敬佛菩薩其心乃如夜叉羅刹之以
人為食也故罪深惡極自作之孽難逭活也先是分封
四部衆建宰桑四圖什墨廿一昂吉蓋欲繼絕舉廢以

休以息也而何煽亂不已焦爛為期終於淪亡胥盡伊犁延袤萬里寂如無人之域也是非我佳兵不戢以殺為德也有弗得已耳西師之什實紀其詳悉也以其反覆無常遲益久而害益深則其叛亂之速未嘗非因禍而致福也是蓋

天佑我皇清究非人力也伊犁既歸版章久安善後之圖要焉已定者詎宜復失也然屯種萬里之外又未可謂計之得也其潛移默運惟

上蒼鑒之予惟奉時相機今日之下亦不敢料以逆也
是平定準噶爾後勒銘伊犁之碑所由作也

重修柏林寺碑文

京師名刹不勝紀而柏林寺以傳近

雍和宮特著

雍和宮者我

皇考興慶潛邸也

皇考祝釐

皇祖故於康熙癸巳施檀重修且請於

皇祖特賜萬古柏林之額若禪堂若經閣則皆

皇考寶翰後先輝映至自今又四十餘年矣塗之丹者
日以剝構之聳者日以落爰以乾隆丁丑仲冬勅所司
葺而新之逮戊寅長至訖工寶界莊嚴人天增勝攷寺
之始創也不著於圖志惟明正統間所存故碣稱元至
正七年肇建乃其所援据僅出屋梁題字近時孫承澤
春明夢餘錄闕而不詳朱彝尊日下舊聞亦第載夏景

金湜已琪輩故嘗聯詠於此將謂希風蓮社則可若薌
林興起之緣不足引以為重也夫史策所傳天池躍龍
之篇一名一物猶必鄭重愛惜被諸樂府垂示無窮茲
也精藍翼然依光

聖蹟所以肯構而崇飾之者匪直表章緇素而已夫人
之情雖善忘而孩提時事或不忘者以其見聞久而孺
慕切也茲寺之葺其不可已者以此將作以礱石請故
不徵象教言詮而書之重紀實也

平定回部告成太學碑文

建非常之功者以舉非常之事舉非常之事者以藉非常之人然亦有不藉非常之人而舉非常之事終建非常之功者則賴

昊蒼篤貺神運幹旋事若禍而移福機似逆而轉順順天者昌逆

天者亡故犁準夷之庭掃回部之穴五年之間兩勲並集始遲疑猶未敢信終劼劼以底有成荷

天之龍在茲畏

天之鑒益在茲爰叙其事如左達瓦齊之就俘也伊犁
已大定矣無何而阿睦爾撒納叛彼其志本欲藉我力
以成已事時也人心未定佐饗者嘗一蠱肆狂萬狙應
響蜂屯蟻襍不可爬梳畏難者羣謂不出所料準夷終
不可取並有欲棄巴里坤為退守謀然予計其衆志不
齊將有歸正倒戈者於是督策將帥之臣整師亟進既
而伊犁諸台吉宰桑果悔過勤王思討逆賊以自贖此

天恩助順者一也二酋大小和卓木者以回部望族久
為準噶爾所拘於阿巴噶斯鄂拓者也我師既定伊犁
乃釋其囚以兵送大和卓木波羅泥都歸葉爾奇木俾
統其舊屬而令小和卓木霍集占居於伊犁撫其在伊
犁衆回乃小和卓木助阿逆攻勤王之台吉宰桑等阿
逆賴以苟延及我師再入阿逆遂逃入哈薩克而霍集
占亦即收其餘衆竄歸舊穴此

天恩助順者二也準夷之事前紀略見梗槩茲不複紀

紀興師討回之由則以我將軍兆惠在伊犁時曾遣副都統阿敏道往回議事小和卓木乃以計誘阿敏道而拘之及我師抵庫車問罪彼攜阿敏道以來援至中途害之及從行者百人彼猶逞其狂勃抗我師顏且敢冒死入庫車城乃雅爾哈善略無紀律致彼出入自由然我滿洲索倫衆兵士無不念國家之恩効疆場之力故能以少勝衆逆渠懼而免脫此

天恩助順者三也知僨轅之無濟掄幹材之可任時將

軍兆惠以搜勦準夷餘黨至布露特部落已款服其衆
因命旋師定回部於是克庫車存沙雅爾定阿克蘇略
烏什收和闐師之所至降者望風直至葉爾奇木城下
而我軍人馬周行萬有餘里亦猶強弩之末矣二酋以
其逸待之力統數萬人與我三千餘人戰我師之過河
者纔四百餘猶能斬將奪旗退而築堡黑水固守以待
此

天恩助順者四也萬里之外抱水救火其曷能濟乃予

以去年六月即降旨派兵撥馬欲以更易久在行間者耳故兵馬率早在途一趨進而各爭前恐後人人有敵愾之憤此

天恩助順者五也副將軍富德及叅贊舒赫德輩率師進援以速行戈壁中馬力復疲值狂回據險坐俟頗有難進之勢夫援軍不能進則固守以待者危矣而叅贊阿里衮驅後隊之馬適至夜擣賊營我師内外夾攻彼不知我軍凡有幾萬握炭流湯之徒自相蹂躪顧命不

暇於是解黑水之圍鹿駭虜驚遁而保窟我之兩軍合
隊全旅以迴阿克蘇此

天恩助順者六也既而彼料我必再入泰山之壓難當
乃於我師未進之先攜其部落載其重器跳而遠去而
葉爾奇木哈什哈爾二城之舊伯克等遂獻城以降叅
贊明瑞一邀之於霍斯庫魯克副將軍富德再陷之於阿
爾楚爾於是離心者面內前途者反旆二酋惟挈其妻
孥及舊僕僅三百人入拔達克山境此

天恩助順者七也人跡不通之地語言不同之國既已
雀毆寧不狼顧其授我與否固未可定也然一聞將軍
之檄莫不援旗請奮整旅前遮遂得克渠函首露布遙
傳此

天恩助順者八也夷考西師之役非予夙願之圖何則
實以國家幅員不為不廣屬國不為不多惟屢守成之
志無希開創之名兼以承平日久人習於逸既無非常
之人安能舉非常之事而建非常之功哉然而輾轉輻

湊每以艱而獲易視若失而反得故自締始以逮定功
雖予自問亦將有所不解其故而不敢期其必然者故
曰非人力也

天也夫

天如是顯佑國家者以

祖宗之敬

天愛民蒙

眷顧者深也則我後世子孫其何以心

上蒼之心志

列祖之志勉繼繩於有永保丕基於無窮乎繫以銘曰
二酋偕德始亂為賊是興王師報怨以直伊犁既平葛
爾奚屑徐議耕闢徐議戍設以噢以咻伊予本懷豈其
弗戢圖彼藐回彼回不量怒臂當車戕我王臣助彼狂
狙始攻庫車僨轅敗事用人弗當至今為愧悖逆罪重
我武宜揚易將整師直壓彼疆阿蘇烏什玉隴和闐傳
檄以定肉袒羊牽二酋孽深知不可活狼狽相顧固守

其穴桓桓我師周行萬里馬不進焉強弩末矣以四百人戰萬餘虜退猶能守黑水築堡間信達都為之傷悼所幸後軍早行在道督勅連援人同怒心曾不兩月賊境逼臨賊境逼臨彼復微隙馬繼以進賊營夜斫出其不意賊乃大驚謂自天降孰敢鋒撓大駭大膊如虎搏兔案角隴種誰敢迴顧黑水圍解合軍暫旋整旅三路期並進焉賊偵軍威信不可支挈其妻孥遁投所依所依亦回豈不自謀豈伊庇猿而受林憂利厥輜重無遺

盡掠遣其都九遂來獻馘詎惟獻馘並以稱臣捧賁表
章將詣都門奏凱班師前歌後舞尸逐染鍰溫禺豐鼓
露布至都正逮初陽
慈寧稱慶亞歲迎祥

郊廟告成諸典並舉皇皇太學豐碑再樹豐碑再樹敢
予喜功用不得已

天眷屢蒙始之以武終之以文戡亂惟義撫衆惟仁布
惠施恩寰寓共喜古不羈縻今為臣子疆闢二萬兵出

五年據實書事永矢乾乾

平定回部勒銘葉爾奇木之碑

粵稽回始肇自天方又名默克一曰天堂大食見元回
鶻見唐是皆仿髯所傳弗詳惟我皇清撫有華夏血氣
之倫均歸陶冶準夷昔強冥頑弗下恃厥險遠實梗化
者貔貙其衆豺狼其羣以回為羊役以耕耘利其善賈
三倍市欣拘二酋長處伊犁濱四大回城輸租獻賦騰
格是供衛拉是懼繭絲奚堪溝壑已遠有面內心其何

能訴準夷既平羣臣見天謂自今始飽食晏眠遣厥首
歸撫爾土田生死肉骨詎疑變遷詎疑變遷德竟怨報
助我叛疆戕我使軺叶是用興師聲罪致討叶乃敢抗
顏蝸蟬謹譟既侮厥外宜安厥內而何狂狙心焉昏憤
殺人為戲奪妻為穢大失衆心無不怨背三道並發四
甄齊攻首知弗支自擄一空廿日之前駢走無踪爾雖
無踪我追應窮滔滔洸洸連戰皆克旦夕苟延遂入異
域異域畏懷舉旗助力腐鼠莫遁遂來獻馘二首既殲

諸回永靖叶設官定賦去其苛政昔之諸回曉戰夜偵
今恬以嬉各保性命昔之諸回為準夷臣今語鄰封曰
天王民曰天王民誰汝苦辛藝爾稷黍爾子孫在昔
己巳爰平金川茲定回部亦己卯年歲符理紀瑞疊祥
駢持盈保泰惟懋慎旃

平定回部勒銘伊西洱庫爾淖兒之碑

機有視若失而反得智者之所勲而愚者之所惑也事
有初若勞而終逸壯者之所劬而懦者之所怯也若夫

定全回殲二酋戰無不克攻無不取皆二將軍及諸叅
贊以及行間衆將士之力也然予亦有所深慰於其間
者則以五年劾劬宵旰運籌狎至實未敢偷安於頃刻
也幸我武保定庶因答

乾貺慰

先志且以免浮議之指斥也伊西洱庫爾淖兒者我副
將軍富德等窮追二酋至拔達克山之界獲其降者萬
人二酋僅以身免而遣使索俘遂得獻馘振旅以成茂

勳也其地倚山臨水單騎可容而我突將無前四甄並
發如入無人之域也賊衆首尾不能相顧豎我回纥以
招之降者鋪崖以來霍集占持刃止之或且反戈倒戟
也是以二酋見事不成拔身遠逃駭寃而喙息也先是
威之於霍斯庫魯克襲之於阿爾楚爾無不以少勝衆
批亢擣堅桓桓之士真如驅虎豹而逐狸兔纏頭碩臯
者流皆怙怙踉踉見即辟易也是以先聲異域駭其跳
盪遮逆助順用攫重輜而獻兗級也我兵未深入拔達

克山境者則以討逆之師不蹂無罪之地姑遣使焉彼
或曉逆順亦將擒獻是以將帥之臣審機度時我武少
輯也卒歲事而告成功則亦未為計之失也回部始末
已見於勒銘葉爾奇木之碑辭不複綴也特紀耆定之在
茲是以誌歲月而刻石也

御製文初集卷二十

欽定四庫全書薈要卷一萬三千二百六十

集部

御製文初集卷二十一

碑文

重修弘仁寺碑文

弘仁寺者康熙四年奉

勅所建移供鷲峯寺梅檀瑞相於斯我

皇祖再世如來現轉輪王相以金仙象教流傳資翊治
化因而遠溯靈跡俾人天廣利迄今垂及百年丹腹之

煥者日以剝龍象之罔者日以削敬惟開歲為
聖慈七旬大慶今歲又朕五十誕辰思所以繩
寶構祝

鴻禧者爰以孟陬之吉出內府帑重加修葺閱八月訖
工展禮為讚有瑞紀庚辰重輪奐奇從辛卯肇胚胎之
句蓋誌實也朕惟君子體仁則為弘世尊闡仁則為能
彼弟子之未轅師學者尚不識何為弘而何為能有似
與仁背馳宜乎儒者之闢為異端矣我

皇祖內外一如本末共貫六十一年深仁厚澤普被蒼
生則其弘也為何如抑其能也為何如此寺之建豈徒
以人天福德供養世尊已哉經言世尊具三十二相八
十種好然若以色見聲求即毘首天匠徒勞畫炭無有
似處設諸淨信一舉念皈依亦得即覩百千萬億化身
所謂即心即佛不可言同何況云異而彼優填王撫範
瑞相譬如日光月光本來圓滿一切衆生扣槃捫籥今
將與操熒燭者求義馭曷若引金燧以晞陽將與挹涓

勺者擬望舒曷若懸方諸而衍潤矧爾時授記真容威
德自在乃者勝旛法鼓莊嚴端好非謂與諸天寶網種
種供養無二無別以是助宣政教永闡慈仁即現無量
壽身而為說法則猶我

皇祖上為

宗社延庥下為蒼黎祈祐之

志而瑞相因緣詳著

皇祖御銘者此不復書

重修涿州石橋記

徒枉輿梁月令所著則橋之設與夫毀而修乃王政所
必先而非浮屠氏漫舉因果利人所可同日語也涿州
為畿南要郡萬方玉帛諸生計偕以及官吏商賈攜孥
負販之徒往來所必經郡城北胡良拒馬二河匯焉明
時各就其上建橋顧北方之水流無定橋建而河徙橋
乃跨陸河則仍資舟楫與無橋同庚辰春允地方大吏
請於舊橋南移建九空新橋仍築石隄下為涵洞廿有

二屬之城北門其舊橋之頽廢者葺之改為涵洞十八以洩夏秋霖潦通新舊橋隄長二百丈有奇至八月而工成大吏請為碑記以記歲月其辭曰涿之城誕拱皇京胡良拒馬自西東注厥初跨河橋營其所不合槁短而隄長北方水流無恒及蓄隄隄敗橋反陸置往來之人嗟行潦以徂征墮者扶之堙者疏之俾水有就下之路而不與隄爭斯王政之一端以就舊材亦不大費司農或曰宮閭佈施或曰璫豎威福緬遺蹟猶致恨夫前

明君何為者乃若是焉宜彼社之屋吾於是凜殷鑒而
兢兢

重修涿州佑濟龍神祠碑文

庚辰春命大吏重修涿州永濟橋橋東南故有

龍神祠歲久並就彫剝飭工斤而新之越辛巳西巡旋
蹕省視落成則行者利往來居者時蓄洩善夫人事集
而

神貺臻數典庶無關也議禮家謂

龍之祀自史記朝那龍湫始顯其文不秩於三代殊不知經訓所載山川能興雲雨致神物以為民茫者民必祈而報之近至一坊一庸尸祝索饗惟恐後矧涿郡地列望緊當九畿之會而胡良拒馬二水渟涵歆飲用衍潤我神臯其必有以默相之也固宜或者疑有明已來水汎而槁圯匪一昔矣

神將奚妥焉諗之曰

神依無在無不在曩者祠與槁雖廢而

神之精爽固無不在也今者橋與祠成而必曰在是是猶未知

神之無不在也然橋若祠煥然一新顧弗致精乎其所式憑以斲所為佑且濟者其可乎哉夫脩廢舉墜不可以人事未集而壹聽諸

神其又可以

神妥於斯而不益懋夫人事耶則輿梁為政之句足深長思已繼自今若蓄洩在居者往來在行者尚其善保

厥成以永孚於

神庥而可哉
稿記緣起已詳茲因祠石請文書以揭之
如此

實勝寺後記

歲己巳建實勝寺於西山之下其緣起已見前記不復綴今賴

昊天垂佑

宗社篤祐平準噶爾回部拓地伊犁喀什噶爾葉爾羌

一帶二萬餘里其外羈縻附屬如哈薩克布魯特安集
延拔達克山等部不與焉凡乘機決計信賞必罰奉

天討罪藉衆集事諸大端具見太學之碑開惑之論西
師之詩亦不復綴茲記者寺左近健銳雲梯營實居之
營之兵是役効力為尤多故不可不旌其前勞以勸夫
後進先是呼爾瑞霍斯庫魯克之戰我師以少敵衆而
賊據險伺隙故凡行陣參伍彌縫之際畧覺旗靡鼓餒
處得健銳兵數十立其間則屹如堅城整而復進遂乃

斬將奪旗用成殊績蓋索倫兵馬射雖精以之馳突乘勝
破陣無不如志而知方守節終不如我滿洲世僕其心
定其氣盛夫人出萬死一生為國宣力而為之君者事
成而忽若忘獨何心哉朕豈為之哉自己已設此營而
辛巳即收其效不啻樹樹十年之得報是潛移默運有
若

天授予亦有所不知其然而然者而敬繩

祖武丕揚國烈瞿瞿惴惴惟盛滿之是懼猶初志也是

用重勒碑記之且肖喀喇烏蘓嚴迫之狀築堡其側歲時幸香山閱健銳兵用寓尹鐸晉陽之意不亦可乎

重修朝陽門石道碑文

直省漕艘估舶帆檣數千里經天津北上至潞城而止是為外河引玉泉之水由京師匯大通橋東流以達於潞用以轉運者是為內河然外闊而內狹故自太倉官廩兵糈暨鄽市南北百貨或舍舟遵陸徑趨朝陽門以舟緩而車便南北之用有不同也其間輪蹄絡織曳挽

邪許謹聲徹昕夕不休故常以四十里之道備水陸要衝而舊制初未甃石往往積淤成窪經潦作濘行者弗便焉雍正七年我

皇考世宗憲皇帝

命工始建石道規方定則垂利數十載於今顧神皋理大物博民用不舍質之貞者日以刊理之綴者日以泐不亟治將隳

前功是懼爰咨將作都料以聞朕曰毋擲帑毋狹材帑

櫛是重縻帑也材狹是重廢材也時大臣董斯役者楮
櫛為平易礫以整物備用良無坎無垤而石之斤舊佐
新者什不存四五矣計延袤六千六百四十四丈有奇
支戶部金二十八萬四千九百有奇經始於乾隆丁丑
十月越庚辰七月落成所司請為之記朕惟古王者成
梁除道若司空循邑遂師巡野諸令匪僅謂國家體制
宜爾蓋深以息人勞珍物力使天下潛消夫湫隘耗憊
之氣無歎於書之所云會歸易之所云往來受福者而

天下肩摩轂擊轉相忘乎熙熙攘攘不過如庭斯城如
徑斯甍焉耳則王道之大也豈煦煦然起一夫之蹶與
一車之杙若子輿氏所譏濟人為悅而已哉是地為國
東門既食債交會而修廢舉墜又立政之常經故於鐫
碣無侈詞惟申言重修端委所由且作亭覆之俾勿壞
重修廣寧門石道碑文

廣寧門在京城西南隅為外郭七門之一然天下十八
省所隸以朝覲謁選計偕工賈來者莫不遵路於茲又

當國家戎索益恢悉荒徼別部數萬里輻湊內屬其北路則徑達安定德勝諸門而迤西接軻聯鑣率由緣邊腹地會涿郡渡盧溝而來則是門為中外孔道尤不與他等乾隆丁丑十月勅所司重修石道以利行者至庚辰七月乃竣於是上邇我

皇考命工初建時逮今三十年矣茲役也因舊陟修築者一千九百八十四丈有奇又新道增築者四百七十七丈有奇凡支帑金十三萬八千一百有奇崇

先制詔後來不可以無紀也系之辭曰

閭闔之門

天垣所直揭以杓攜言歸有極

聖者法象度地經涂詎惟同軌在閭孰隄睠時垓埏日
就星拱巍闕中亘層闔外輦西南坤位利用安貞魚鑰
曙開蕩蕩由庚總總搏銜班班叱馭嘉此康瓠叙其輦
互赤畿望緊放乎湓陬冠帶畢徠顙面纏頭記

功伊始歲屆辛亥辟塗陟茨逮茲廿載石不可轉亦剗

而剗冬皸涸凍夏蓄潢汙大井之村盧溝是屬掇之鑿
之為經緣督萬指歲事帖妥弗歌廣則由舊而修益之
其修幾何匪作緊述其益幾何居五之一里鼓中頓堦
亭前遮胥爾逖聽若轅殿家予臨天下道在無頗竇哉
壤歌何有於我

重修萬壽寺碑文

天純祐我函夏既屢豐錫羨俾恬養引年越大濛䟽逖
習爽胥敗章畊牧躋之春臺是用大介蓋貞元嘉會保

泰者兢兢乎千載一時而我

聖母皇太后七袞慶辰適逢斯盛朕將率億兆臣庶祝
嘏延洪以

聖節崇啓經壇莫萬壽寺宜爰勅內府丹堊即工視乾
隆辛未例弗懈益虔事載歲系之辭曰維茲寺修建端
委暨諸天無量壽義著在前文者無俟繁稱矣曷記乎
則敬頌我

聖母愛民延禧之

懿訓以質言臚近事可乎嚮者東南耆耆顯迓

安輿樹領翹趾者相屬偶會偏隅賙賑朕上體

慈懷載稽撰日閱丙子而丁丑閱辛巳而壬午迨取道
展禮清涼則祥霽甘澍醴醕繽紛九寓奄觀倍稔揆諸
古德所云覺照佛心福利仁化何以加茲若乃西人敬
關請師亟於揀焚拯溺朕荷

天

祖鴻庥寅承敢後每旁午擘畫稟命

璇聞備仰我

聖母始事之

勤劬與成功之

愷豫迄今流沙數萬里悉古烏孫大宛勃律于闐諸部
不啻偃修羅之弓戟而亭以慧雲沃以法雨同登極樂
國土者我

聖母壽世無量之心一我佛壽世無量之心而朕額手
虔拈即願以無量萬世壽壽我

聖母者庶於是焉徵實可記也夫遂繹其旨而為之讚
我聞法王法不受轉輪轉調御大能仁安車濟五行以
茲壽者相超劫長圓滿一萬二萬年迦葉那含闍至六
萬七萬毘舍拘留展次佛及初佛積萬乃無篡同聲祝
聖慈金口宣元典壽世而壽身真實義斯踐佛云四部
洲玉燭平潦旱化日諸衆生各各得飽暖是名恒春國
有穀無不戢佛云彼羅刹種種方所限銷兵窮荒徼蒲
海壹清晏是名大願船淨域歸重趺

聖慈皆佛慈是諦叅密顯懽喜證人天三呼善哉善

楊橋河神祠碑記

乾隆辛巳七月豫中秋霖大至河溢祥符黑堽口急命
侍郎表曰修馳傳勘視俄而會城驟漲侵淫遂潰楊橋
隄奪溜賈魯河河臣張師載撫臣常鈞連牘以狀聞且
惶恐謝守土不謹朕曰爾勿棘爾分益有界限惟豫艱
是圖寧為全河計乃者燕齊迄北並積潦滙中州而下
勢必張所過事乘障不已將釀南河患艱以上游之治

治今爾疆陂堰縱不戒未越宿而徐城暴長之水乃陡
落庸渠非不幸之幸然爾時賈魯方演漾潁壽注洪澤
湖日夜挾沙奔流淮病黃愈病是不亟治上游而下游
又烏可以不治治於時大學士劉統勲協辦大學士尚
書公兆惠就行在授指往董厥事而撫臣常鈞等方議
盡塞南岸旁決之口徐興築楊橋隄弗戢旁口益堵即
大溜益湍此何異醫者不察標本欲悉壅閑諸孔竅妄
覬調停腹潰哉洛爾胡寶琮爾早習豫河要害其再調

撫茲土汔贊有成洛爾高晉爾簡率江南練工弁卒繕
畚揭芟捷先後飲助之爰廣代賑集厥力增薪值贍厥
財其急衝之不能猝迴者親為按圖審度點筆為誌令
鑿引渠醜河溜重臣覆奏至亦不謀脗合夫然後衆志
齊而儲待周工作以次就理斯役也漫口初止六十丈
汕墊至二百餘丈視前此南河之朱家海張家馬路盖
三倍而贏自蠲除賑給暨別件營輯外計大工專支帑
金三十萬有奇經始於九月一日合龍於十一月一日

為時甫兩匝月統勲等以程績罔稽導引時兼有返風
之應宜建

河神祠并請頒額勒碑用申昭報朕念洪河故四瀆之
一而歷代遷徙不常雖神禹無由善其後豈非勢弛於
日下補苴者必以爭上游為得策歟自豫河決而復合
其歲三吳沮洳之壤黃流順軌磬鼓弗聞以彼絜此差
數瞭然可覩匪

神貺默臻曷以至是若朕宵旰勤求之苦衷具見誌實

詩中並命鐫諸石示我守臣體之有永毋墮後效母棄
前勞是為記

御製文初集卷二十一

欽定四庫全書蒼要卷一萬三千二百六十一集部

御製文初集卷二十二

雜著

擬九歌十二首題莊子故事圖

姑射神人

雲寵霞子絙崇岡峯礪礪子葉丹黃藐姑射子名誰名
若有人子處其中冰雪肌子綽約容乘雲氣子御飛龍
遊凌兢兮周八荒羌萬物兮被礪旁羨莫見兮增慨慷

庖丁解牛

徹肺鼈兮炮羔與安胡兮楚苗薦庖丁兮搗牛睥理解
兮崇朝既踦膝兮倚肩乃奏刀兮騞然經肯綮兮未嘗
況大軋兮是干繫游刃兮有餘地曷試思兮其始難

支離鼓笑

嗟若人兮形支離肩高頂子頤隱齊五管在上兮髀為
脅其餬口兮以鼓笑無遠戍兮免常徑以病受粟兮養
其身以不勞吾於是知神人之無用兮恒萬古而逍遙

壺子示機

神之子兮曰季咸期天壽兮若神曷壺子之猶龍誕猶
喻夫三淵雲出谷兮水行地彼寧知其誰何兮夫豈大
塊之有意鄭人之冥冥兮第未解夫四示詎吾宗之可
常兮固知之人之未深思

列子食豕

歸來兮列子寒宅外兮不可以止忘糠缶兮漿觴知食
人兮食豕既復朴兮紛而封馳萬物兮無窮春蘭滋兮

時雨秋梧飄兮涼風吾方與天帝同游兮寧知日月之有終

儵忽鑿窾

幹元緯兮造太清曰渾沌兮爰帝名何儵忽之二子獨
憧憧兮屢征彼報德乃戕身兮人皆咎二子之不近情
嗚呼儵忽兮獨非渾沌之所生孰能保此太初兮膏吾
車兮吾將從

象罔得珠

赤水兮崑崙峯
碣磳兮波沕淪
君於焉兮夷猶駐芝蓋
兮華軒遺元珠兮屢索異哉象罔兮乃可以得余幻寶
此竒琛兮年既老而不衰
悅偶遺之若失兮幸屢索而
得之吁嘻象罔兮得毋余嗤

輪扁斲輪

君讀書兮堂上臣斲輪兮堂下
君之書兮古人臣之輪
兮臣者疾則苦兮徐則甘
應心得手兮口不能言有數
存焉於其間庸詎知臣言之非糟粕兮君幸恕臣之狂

顛

東施捧心

有美人兮山之阿溪若耶兮村苧蘿常病心兮若思曠
雙眉兮脩蛾姱婁矜兮曾波彼何人斯強效為富閑戶
兮貧去之所以美兮彼不知貌假借者盍鑒茲

濠梁觀魚

撰良辰兮遊濠梁眴遊波兮風迴風流澹湛兮水草芳
儵魚出兮游從容噏蒿蓼兮之而張是魚樂兮爾我同

聊容與兮斯徜徉吾固知之兮於濠之上

疴僂承蜩

爰有人兮形疴僂居楚野兮山之幽仰叢薄兮枝相繚
辟若槁枝兮日承蜩天地之大有所弗知兮惟蟬翼之是
求盖有道兮不與萬物為儔吁嗟斯人兮羌得全於天
者流

伯昏論射

觀君射兮信竒鄰至人耶然疑登高山兮截崕臨百仞

分淵漪背逡巡兮足垂外揖君進兮君辭君於中兮殆
矣挾弓矢兮奚為綴余目兮青天寄余神兮九圍永泊
然兮自適歷萬劫兮不知

讀宋史徐積傳

予嘗讀宋史徐積傳載積孝行出於天三歲父死旦旦
求之哀母亡廬墓三年哭不絕音又稱以父名石終身
不用石器行遇石則避而不踐未嘗不三歎史筆之難
得而恠脫脫輩之無史識也夫叢冗委屑華而不實俚

而不文如是者皆不可以當史筆無是病矣而一字之
褒貶不足誅奸回於既往黜潛德之幽光則不能出沒
人於千百歲後是史筆非難史識為尤難也故大惡大
善雖細行必紀反經由權雖嘉言亦黜積也考書其生
事死葬之盡誠盡禮足矣不應以其不用石器與避石
不踐之細行累孝子之大德夫積不用石器不踐石豈
非以其觸父諱乎諱亦出於禮而吾直以為累孝子之
大德者其亦有說蓋禮云二名不偏諱言在不稱徵言

徵不稱在是在徵二字單舉之尚在所不諱必其姓與
名合斯則諱而不敢稱然亦孝之小節而已矣若以父
名石而子不踐石為孝則公子地之子當舟居而不履
地乎父名石而子不踐石人尚可能父名地而子不履
地人所不能也詩曰孝思不匱永錫爾類大孝達於天
下必蘄人人皆如己之孝於父母孝子之心斯愉快焉
今乃為人之所不能為以為己之孝過於天下人之孝
豈孝子之心哉故大孝莫如舜不聞其見瞽目者輒拜

而積乃今以不用石器與避不踐石稱豈非累積之大者乎然積非有心於為此以求名也觀其讀孝經輒淚落不止雪夜伏墓側悲慟嘔血是乃本於天性之自然彼遇石則怵然傷心而思親亦其出於至性有不能自已者而為史者例當守千秋法則之正一字褒貶之公凡不合經常之行雖嘉可刪設惜其湮沒而無聞則自有裨官野史在吾故曰史筆非難史識為尤難而恠脫脫輩之無史識也

漢玉斧款識

漢玉斧一羨七寸有十分寸之七博四寸以為首豐其
末加十分寸之二首之厚六分刻其末以為及記曰朱
干玉戚冕而舞大武此其遺制歟古者以斧為文義取
其斷而以玉為之意溫潤之中不失裁制之用耶

讀公羊

余讀公羊至許世子止之事不禁廢書而歎曰嗟乎迂
儒失聖人之旨逞強辭之奪而後世方稱其鼎足丘明

獨能傳說不亦師心刺謬乎夫許世子之事左傳隱躍其言而穀梁則不過曰即止自責而責之而已耳至夫子高則直引樂正子春之事以證之一則曰聽止也再則曰赦止也且人子之視疾或一藥而愈或數藥而愈或數藥而竟不愈或一藥而竟不愈者有之矣即子春之親豈能常存於世其非進藥而不愈者乎則是千萬世之人盡不能免止之罪抑亦盡將得止之赦也夫逆天之誅聖人何忍慢以罪人而又慢以赦人也止之進

藥必有不敬誤投之咎非啻不盡不嘗而已然其心終
無他故其罪止於是而蘇轍胡寅之流方且祖其說演
義游辭失之愈遠矣

讀荀彧傳

予讀范曄荀彧傳而歎曄之有史材而無史識也夫史
材非難史識為難自遷固即已不免此病而何恠乎曄
哉蓋遷固之失失以駁而未嘗混黑白妄褒貶若曄之
稱彧以歸正成仁則何異乎譽盜跖為義而美桓溫以

臣主之忠耶善乎劉友益之論或云身為漢臣為操謀
畫以贊其業業已成矣甫以正論自說其無益可知今
夫葛之與袁其相去遠矣然必無今日葛而明日頓袁
之理以漸使之然也操之移漢成魏其陰謀秘策皆或
有以佐之即其沮董昭之議母亦內慙樊鄆外怯孫劉
思欲徘徊少待乎而操已不能平至於黜伏完之書為
狙詐之計禍生空器卒至飲酖所為進退無據孽由自
作耳而曄乃以為崇明王畧紓人於倉卒審如是則仲

連之蹈東海顧乃謂不達時務可乎或之事人不難知而已有顛倒是非如曄者吾於是歎史識之難得而任好惡為予奪者蓋不少矣

讀唐太宗集

予讀唐太宗集見有賜魏徵詩云云注之者曰徵善治酒世所未有信斯言也徵為諂臣太宗不得為令主矣夫太宗三代以下之賢君而魏徵亦有唐之遺直也徵之於太宗知無不言且有不必言而言之者矣醺醺善

醉之物而謂徵自釀以媚君有是理乎夫醺醺媚君封德
彝之流或為之徵而知之將痛切諫之而已乃蹈之耶
昔梁王酒酣請魯君舉觴魯君避席擇言而舉禹䟽儀
狄之事徵豈不知且徵固欲致其君於禹而已乃自甘儀
狄必不然矣或曰太宗納巢刺王妃而徵不能諫則徵
母亦好名茹柔之為而陰有容悅之事或不可知予曰
固也夫好名之人激於一時則或能捨死處之順境則不
忍忘生閹牆之對徵之能捨死也巢刺妃之佯為不知

徵之不忍忘生也即不進不敗之醪太宗未必致徵於死也而徵何必亟亟為之哉三代以下惟恐不好名且以徵之好名而成太宗之名於無窮者亦已多矣徵豈不知治酒之非美名哉千日之醉奚啻十漸不克終而已乎實有其事其時君若臣亦必不肯公然見之歌詠矣或曰太宗之詩多出於董思恭所為是則不可知也已

讀邶風匏有苦葉第二章

詩傳疏及朱注皆云飛曰雌雄走曰牝牡毛孔固失之而朱子亦未詳考也夫見於詩書者雄狐綏綏獸也何嘗不謂之雄牝雞無晨禽也何嘗不謂之牝善乎歐陽修本義云古語通用無常雄鳴求其牡者興夫人不顧禮義而從宣公又宋逸齋補傳謂雄當求匹雌不當求牡斯皆足以喻夫人之犯禮必穿鑿而釋之謂雌雉當求其雄之雄今乃求其獸之牡以為非禮則禽與獸合有是禮乎鳥鼠同穴之山雖鳥鼠同穴而各為匹配無

亂羣之事也藉曰禽獸所無而人為之斯禽獸之不如
因設烏有之事以刺淫佚則怪亂夫子所不語何刪詩
而尚存此章乎且宣姜夷姜論者紛如聚訟而後荆之
事張照已辨之詳茲不復綴余謂讀書當識大意具正
見若注疏家片言隻字之訛政不必為之勉強湊泊而
反晦正義也

記載

記載之失實雖正史不能免而莫甚於稗野之刺謬彼

以一己之私心設為莫須有之論所惡者雖伯夷之清而不為揚其善所喜者雖盜跖之貪而謬為隱其惡所喜者雖盜跖之貪而曲為稱其善所惡者雖伯夷之清而刻以求其惡夫不揚而謬隱猶可也至於曲稱而刻求則是非顛倒莫可究詰使後人見之愚者固以為必然知者且不能不致疑矣知者致疑將謂正史亦未免如此害天下之公亂聖人之道非稗野之所馴至乎如聞見錄龍川志之紀范仲淹富弼論晁仲約之事是已

夫范富二人豈非宋室之名臣哉設如二書所云則是
小人之尤而不可入君子之林矣何則仲約之罪或者
當時介於可殺不可殺之間二人爭之所為上殿相爭
下殿不失和氣者是也今乃曰不可教之手滑然此猶
可也至曰吾輩首領皆不保是何言耶豈有忠臣義士
預為己地而視人君若三尺之童之理哉使范富具此
見是與王安石呂惠卿之流何異其生平立朝出鎮致
君澤民之蹟又何能如正史所傳班班可考若彼乎且

二書載仲約以知軍事遇盜不捕乃斂民金帛餌之過境事蹟詳畧互異罪狀則同至龍川志仲約姓姚而言行錄引之別作晁又志稱知高郵軍而聞見錄作光化郭公傳譌即此可見今覈之萬姓統譜而晁仲約時與官並合是從晁較為有據第其職惟注正奉大夫則其事其人之果否有之固無確據也夫世之隨人是非而無定見者多矣觀此書必且謂范富果有其事仲淹為能先見弼為能服善是教後世為臣者欺其君而盜世

名犯少正卯之誅者有之矣邵伯溫吾不惜而獨惜蘇轍尚稱具正知卓識者亦為此卑謬之論豈其未之思乎抑或未曾質諸其兄以為何如乎

準噶爾全部紀略

自古無不誌外夷而實者少舛者多非以其方域所限言語不通耶得什一於千百加以魚魯亥豕其堪信者鮮矣茲者平定準部止封達瓦齊子一人居之京都且城伊犁駐將軍鎮守事耕牧焉念彼原一大部落不

可無紀故就親詢實事書之亦以便方畧纂叙也準噶爾四衛拉特者綽羅斯部都爾伯特部和碩特部土爾扈特部是其輝特一部本附庸於都爾伯特後土爾扈特竄歸俄羅斯故別輝特為一部仍稱四衛拉特云衛拉特明史稱為瓦剌其音頗近史所載脫歡太師蓋其始祖元亡而其彊臣分為三其渠曰馬哈木者即脫歡之父也脫歡者蒙古準語同為釜今準人語釜為海蘇而蒙古語則仍舊蓋準人自避其祖諱此亦一證也自

脫歡逮孛汗其世次不可考孛汗背正妻與他婦野合而生子曰烏林台已韃太師其母棄之澤中孛汗收養之遂統部落又十一世而傳至賽音諾顏哈喇忽刺是為策妄阿拉布坦之曾祖子曰巴圖魯渾台吉有子十二人五曰僧格策妄之父六曰噶爾丹博碩克圖其餘無事無足稱長曰策臣次曰巴圖魯策臣與巴圖魯殺其弟僧格噶爾丹博碩克圖始自藏中回舊部反俗為汗於康熙年間犯塞戰敗走死先是噶爾丹博碩克圖

既殺兄僧格之次子索諾木阿拉布坦僧格舊臣七人
與策妄阿拉布坦同遠逃準語所謂多倫努庫爾者是
多倫者漢語為七努庫爾者漢語為友蓋其患難相共
所謂世臣並赦其子孫七死云及噶爾丹為我兵敗策
妄始還和博克薩里收其父舊屬及噶爾丹餘衆復成
部落并縛噶爾丹子獻闕下遂自據汗位子噶爾丹策
凌噶爾丹策凌子策妄多爾濟那木扎爾其庶兄喇嘛
達爾扎執而篡之達瓦齊復因阿睦爾撒納之計篡奪

其位達瓦齊者已圖魯渾台吉之第七子布木之子大策零敦多卜之孫於策妄為再從姪孫其小策零敦多卜則策妄之祖已圖魯渾台吉之弟默爾根代青之曾孫其去策妄世派蓋已遠矣先是康熙年間噶爾丹博碩克圖拘繫和碩特車臣汗收所屬人衆併入準噶爾鄂拓克其時有和碩特之拉藏汗者居唐古忒地即顧實汗之裔也子二人一名丹衷一名索爾扎丹衷由唐古忒仍回至厄魯特娶策妄阿拉布坦之女博托洛克

為妻後策妄阿拉布坦知其學習哈拉爾查達術

即五
品事

也以兩釜夾丹衷身烙死遂令大策零敦多卜領兵六千襲西藏擒殺拉藏并擄伊子索爾扎我

聖祖仁皇帝

勅諭策妄阿拉布坦不得繹騷唐古忒地並發大兵進勦於是大策零敦多卜攜索爾扎逃回厄魯特藏地復平迨雍正年間策妄阿拉布坦死子噶爾丹策凌欲與唐古忒和好給索爾扎戶十資養並以博托洛克與韋

徵和碩齊為妻其在丹衷處所生子班珠爾給戶五資

養彼時博托洛克復有孕未產適韋徵和碩齊後乃生

一子是曰阿睦爾撒納故阿睦爾撒納雖為輝特台吉

實與班珠爾皆丹衷之子噶爾丹策凌死策妄多爾濟

那木扎爾恐索爾扎之子納哈查逃往唐古忒將伊禁

錮至達瓦齊篡立始將納哈查釋放又和碩特羅卜藏

車凌者娶策妄阿拉布坦之女達什色布騰為妻噶爾

丹策凌時因羅卜藏車凌率領伊屬萬戶欲往土爾扈

特遂遣兵擒獲羅卜藏車凌囚之以其妻給韋徵和碩
齊二子交烏魯特鄂拓克宰桑伍已什安置至青海居
住之羅卜藏丹律於策妄阿拉布坦時逃至準噶爾策
妄阿拉布坦死後羅卜藏車凌羅卜藏丹津二人謀殺
噶爾丹策凌嗣因羅卜藏丹津被拘羅卜藏車凌恐亦
被囚遂欲逃往土爾扈特故雍正年間我

世宗憲皇帝索羅卜藏丹津噶爾丹策凌稱已縛送至
中途聞進兵而止者非詐也蓋彼業經拘繫之囚故不

斬固而且欲以為奇貨也噶爾丹策凌於丑年死策妄多爾濟那木扎爾年幼其姊鄂蘭巴雅爾同母出也每以善言相勸禁其淫亂策妄多爾濟那木扎爾年既長遂不受其禁制並聽讒言謂其姊欲效俄羅斯自立為扣肯汗

扣肯汗者女人掌國事也

遂將鄂蘭巴雅爾拘繫並殺戮多

宰桑其後屠狗盜妻之事無所不為益無忌憚鄂蘭巴雅爾之夫薩音伯勒克遂同噶爾丹策凌庶子喇嘛達爾扎攻執策妄多爾濟那木扎爾喇嘛達爾扎遂篡汗

位有噶爾丹策凌幼子策旺達什者阿睦爾撒納班珠
爾欲誘出策旺達什立為汗後被喇嘛達爾扎知覺遂
殺策旺達什阿睦爾撒納班珠爾二人慙惙達瓦齊云
喇嘛達爾扎既將與爾同讎之達什達瓦小策零故多卜之子殺
戮恐禍將及爾於是達瓦齊阿睦爾撒納班珠爾三人
同逃哈薩克至申年達瓦齊阿睦爾撒納班珠爾復回
舊游牧處阿睦爾撒納遂殺其兄沙克都爾據其衆復
與伊犁喇嘛等合謀殺害喇嘛達爾扎立達瓦齊為汗

其次即阿睦爾撒納用事二人仍屬親厚有達什達瓦姪訥默庫濟爾噶爾者欲與達瓦齊分領準噶爾猝率兵一萬至伊犁與達瓦齊戰達瓦齊敗至舊游牧額米爾處與阿睦爾撒納會因阿睦爾撒納計誘執訥默庫濟爾噶爾誅之準噶爾衆仍立達瓦齊為汗達瓦齊聽伊犁衆宰桑言與阿睦爾撒納生隙阿睦爾撒納本垂涎汗位既失望遂與班珠爾納哈查及都爾伯特訥默庫等會同哈薩克將額米爾一帶住牧者肆行擄掠且

耕種額爾齊斯為自固計達瓦齊凡三遣兵勦阿睦爾
撒納皆不克其後自領兵三萬至阿睦爾撒納游牧之
額爾齊斯處之阿睦爾撒納勢不敵始投誠來歸此準
噶爾始終構亂所由也至準噶爾鄂拓克昂吉之名各
異者鄂拓克為其汗之部屬昂吉為各台吉之戶下舊
鄂拓克凡十有二烏魯特有四宰桑人五千戶為一鄂
拓克喀拉沁有一宰桑人五千戶為一鄂拓克額爾克
騰有一宰桑人五千戶為一鄂拓克克里野特有二宰桑

人六千戶為一鄂拓克卓托魯克有一宰桑人三千戶
為一鄂拓克布庫斯有一宰桑人三千戶為一鄂拓克
阿已噶斯哈丹各有一宰桑共人四千戶為一鄂拓克
鄂畢特有一宰桑人三千戶為一鄂拓克鄂羅岱有二
宰桑人三千戶為一鄂拓克多果魯特有一宰桑人四
千戶為一鄂拓克霍爾博斯有一宰桑人三千戶為一
鄂拓克綽和爾有一宰桑人三千戶為一鄂拓克其後
復立鄂拓克十有二已爾達木特有三宰桑人四千戶

為一鄂拓克庫圖齊納爾有五宰桑人四千戶為一鄂
拓克噶爾禰特有三宰桑人四千戶為一鄂拓克沙拉
斯有二宰桑人三千戶為一鄂拓克嗎唬斯有一宰桑
人五千戶為一鄂拓克布庫努特有一宰桑人二千戶
圖古特有一宰桑人五百戶為一鄂拓克烏拉特有一
宰桑人三千戶為一鄂拓克阿爾闡沁有一宰桑人五
百戶為一鄂拓克扎哈沁有三宰桑人二千戶包沁有
三宰桑人一千戶為一鄂拓克奇爾吉斯有四宰桑人

四千戶為一鄂拓克特楞古特有四宰桑人四千戶鄂

爾楚克有一宰桑人五百戶烏爾罕濟蘭有一宰桑人

八百戶為一鄂拓克明阿特有二宰桑人三千戶為一

鄂拓克鄂拓克之外復有五集賽阿克把集賽有二宰

桑人四千戶賚嗎里木集賽杜爾把集賽推素隆集賽

伊克胡拉爾集賽各有一宰桑人各一千戶其後復立

集賽四溫都遜集賽善披領集賽各有一宰桑人各一


千戶桑堆集賽品陳集賽各有一宰桑人各三百戶此

九集賽辦理喇嘛一切事務喇嘛有六千餘準噶爾共
六十二宰桑二十四鄂拓克一切供賦俱其汗公物其
外復取烏梁海及葉爾羌喀什噶爾阿克蘇和闐四城
回人租入其二十一昂吉為各台吉所有而統屬於準
噶爾之汗昂吉者準語分支之謂也綽羅斯部之達瓦
齊一昂吉達什達瓦一昂吉多爾濟丹巴一昂吉噶爾
藏多爾濟一昂吉訥默庫濟爾噶爾一昂吉鄂齊爾伍
巴什一昂吉都爾伯特之策凌一昂吉達什一昂吉伯

什阿哈什一昂吉和碩特之沙克都爾曼濟一昂吉輝
特之塔爾巴哈沁薩音伯勒克一昂吉和通額默根一
昂吉多羅特舍楞一昂吉敦多克一昂吉葉克明安巴
雅爾一昂吉車凌班珠爾一昂吉巴圖爾額默根一昂
吉察罕圖克阿睦爾撒納一昂吉博洛果特台吉諾海
奇齊克一昂吉土爾扈特台吉巴圖爾伍巴什一昂吉
吞都布一昂吉共二十一向於西師詩稱二十一昂吉
為其汗公屬者蓋考之而未詳茲始詳詢縷細如右然

各台吉雖分領其昂吉凡出師執役無不聽其汗之令
則初所譯者亦未為大差也統計其汗之二十四鄂拓
克九集賽及各台吉之二十一昂吉得二十餘萬戶六
十餘萬口成一部落者百十餘年語云十人成之而不
足一人敗之而有餘吾於紀準噶爾之事益見其不爽
賈生所謂仁義不施而攻守之勢異雖夷狄之有君豈
能外是道哉

御製文初集卷二十二



總校官庶吉士 臣 張能照

校對官庶吉士 臣 翟槐

謄錄監生 臣 溫之誠